

Көп кизи айланчатханы пiске киртiнiстi киречилепче 4 стр.  
Сергей Шойгу: “Тоғысты улам түзімнiг апарарға” 5 стр.



# ХАБАР



Хакас Республиканың газетазы

Известия

www.khakaschiry.ru

● 11 январь – күрген, среда 2017 чыл, 2 (21117) № ●

16+



Хызыл суғ аалның олғанахтары

## СООХ АПСАХНАҢ ХАР ХЫЗЫҘАХ САНАЛЫҒ ЧИТКЕННЕР

→ 3 стр.

### 12 январьда – Прокуратура тоғынчызының күні

Хакасияның Правительствозы паза Өөркі Чөби Хакасияның прай прокуратура тоғынчыларын профессиональнай үлүкүннең алғыстапчалар!

Сіерер чуртазыңарны оой нимес кирекке чарыт салғазар – прай нима закон хоостыра ползын, кизінің паза гражданиннің праволары, пос чуртазы сайбалбазын тіп көреріне. Чүзерлеп чыллар изерістіре прокуратура халых чонны сын ниместең паза законнаң хыйыстыра полғанынаң арачылапча. Пу тоғыс аар паза нандырығылығ, ол улуг күс хорадарын, законнарны өтіре пілерін, пик сындырлығ паза махачы поларын, пос узын төреміл өскір турарын кирексіпче.

Прай чүреөбіснең алғыстапчабыс сіерерні үлүкүннең. Пик хазых, тоозылбас-хорабас күс паза наа чидіглер алғап-чабыс.

В.М.ЗИМИН,  
Хакасияның пазы –  
Хакасияның  
Правительство кнези

В.Н.ШТЫГАШЕВ,  
Хакасияның  
Өөркі Чөп кнези

Тимненіс

3 стр.

### ЧИҘС КҮНІН ТУРЫСТЫҒ ИРТИРЕРГЕ

Хакасияның пазы Виктор Зимин Илбек Чиңістің 72-чі чылын турыстыра иртірібі-зеріне амох тимненерге чахыг пирген.



Культура

3 стр.

### ...ТОҒЫЗЫ ПӨЗІК ПААЛАЛҒАН

Россияның культура министрствозы республиканың олған библиотеказына «Россияның танығлары» проектте өткін араласхан үчүн алғызын читірген.



### ТОМСК – АҒБАН РЕЙС АЗЫЛЧА

Авиакомпанияның искириинең, Аучуғыстар 23 январьдаң пасти понедельниктерде паза субботааларда толдырыл турар.

Рейсті «СиЛА» («Сибирская легкая авиация» ООО) авиакомпания толдырар, билет паазы пір саринзар – 3385 салковайдаң сығара. Понедельниктерде Томсктаң учуғыс – 1115 часта, Ағбаннаң Томсксар – 11.55 часта. Самолёт, пятницаларда Томсктаң учуғып, Ағбанзар 20.40 часта чит турар. Ағбаннаң Томсксар субботааларда 8.00 часта учух турар.

Рейсті Ан-28 самолёт толдырар, аның салоны 17 орынға көрілген. Чорых тузы – 1 час 55 минута.

Елена ТИМОФЕЕВА

### ТОҒЫСЧЫЛАР КИРЕКТЕЛЧЕ

Республикада ирткен чылда чонға тоғыс тапчан службаларзар тоғыс суриинаң 14,3 муң кизи айланған. 2017 чыл пасталарынаң, пу службаларда санға алыпған тоғыс чох 4736 кизи саналча.

Тоғыс чохтарның 54 %-і ипчи чон полча, 60 %-і – профессиональнай үғредігліг. Тоғыс пирчеткеннер 2931 тоғыс орнына кизілерні киректепчелер, оларның 1799-зы (61 %) – тоғысчылар. Истеніс рыногынаңар хоза искиріглерні піліп аларға чарир Хакасияның чонға тоғыс тапчан службазының порталында пу адресче: [www.zankhakasia.ru](http://www.zankhakasia.ru).

Хакасияның  
чонға тоғыс тапчан хазна комитеді

# КҮН ТАҢМАЗЫ

## «ЧОЛ ПРИСТАВЫ» АЛЫМНАРНЫ ЧЫЫР



**Хакасияның пазы Виктор Зиминнің чарадийн чуртасха кирер пөгиннең, республиканың транспорт министрствозы «Чол приставы» аппарат комплексін садызып алган.**

ХАКАСИЯДА

Ол комплекстің пользыинаян логтарча, штрафтарча паза пасха даа төлегрерче алымныг кизилерни илезине сыгарар тогыс апарылар, ідөк автомобильнең чөрчең праваларын алдыртыбысхан кизилер па-

зох транспортнаң чөрчеткеннерін табарлар.

Чагынғы туста комплекс Чаргы приставтары федеральной службаның Хакасияча управлениезине пирилер.

## МИНИСТЕРСТВО АДЫ АЛЫС ПАРҒАН

**Хакасияның істеніс паза социальной тилис министрствозы амды Хакасияның социальной арачыланис министрствозы тіп адалча.**

Алызыглар істеніс законодательствозы паза істеніс хайраллиры сурыглары Хакасияның чонга тогыс тапчаң хазна комитедінің хо- лына пирилчеткенінең палгалыстыг. Хазна комитеді Хакасияның істеніс

паза чонга тогыс тапчаң министрствозы тіп адалар.

Хакасияның социальной арачыланис министрствозының хайиинда социальной пользыг сурыглары халча.

## ПИЛІСТЕРІНЕҢ СЫНАСЧАЛАР

**Хакасияда үгрөнчилерниң тиксі Россия олимпиадазының региондагы чардыгы иртірілче. Олганнар тиксі үгрөділгіг предметтерче пилістерінең сыназарлар.**

Иң пастагызын үгрөнчилерниң француз тилин пилчеткенін сыныхтирлар. Пүүн паза таңда ирчеткен сыныхтагда тиксі Хакасиядаң 8 олган араласча. Анаң 13-14 январьда

литературача олимпиада иртер. Хакасияның үгрөдіг паза наука министрствозы искіриинен, мында улуг класстарның 19 үгрөнчизи аралазар.

## ХАКАСИЯНЫҢ ТАМОЖЕННИГИ – СЫЙЫХТЫГ ОРЫНДА

**Хакас таможнязының өөн хазна инспекторы Иван Ковзик таможнядаңар «Верещагин» чоннар аразындагы кино мариинда ікинчі орынга сыххан.**

Ол журинің көрізіне «Гибель «золотого» плота» фильм көзіткен. Анда Иван Ковзик Семиозерскай таможняның устагызы Николай Успенскийнің тогыста махачы тудынғанынаңар чоохтапча. Ол 1930 чылда, служба тогызын толдырчадып, чуртазын пир салған.

Марығның тогыс номинациязында 110 азыра таможенник араласхан. Оларның тогыстарын Россияның 13 профессиональной кинематография кирчеткен жури паалаан. Эксперттерниң чоогынаң, көп тогыстар оларны хайхатхан.

## ЖКХ СФЕРАЗЫНДА УЛУҒ СААЙЛАР ПОЛБААН

**Хакасияның пүдіріг министрствозының специалисттері наа чыл үлүкүннерінде республиканың ЖКХ сферазында соох суг пирерінең палгалыстыг хай пирее тудыглар полғанын таныхтааннар.**

31 декабрьда Пии аалда суг пирчең башнядагы насос сайбал парған. Аны алыстырыбысханда, соох суг табырах пирил сыххан.

3 январьда Саяногорскта, соох суг пирчең труба сайбалып, суг

пирилері үр нимеске тохтадылган. Сайбалған трубаны табырах тыхтабысханнар.

Чылыг пирчең сетьтерде паза объекттерде андаг-мындаг сайбаглар таныхталбаан.

## ӨРТТЕҢ СИЗІКТИГ ПОЛЫҢАР

**Пүүл 2 – 8 январьда республикада 20 өрт үзірілген, 1 кизи саайга кирген, 10 кизині арачылап халғаннар.**

Мында иң өөн сылтаг – отнаң, песнең, электрооборудованиенең салбыр тудынғаны. Ол сылтагнаң республикадагы өрт үзірчеңнерниң службазы 400 артинаң тура ээлерінең тоғасхан, сизиндірген, 1500 артинаң листовкалар таратхан.

«Хысхыдагы тынаг күннерінде өрттер саны хозылча. Анзы арага

искенінең палгалыстыг. Аннаңар, пес одынчатса, электроприборларнаң тузаланчатса, сизиктиг поларга сурынчабыс», – чоохтапча Хакасияның ГО, ЧС паза ПБ управлениезинің пастыгы Николай Старков.

Хыйал полбас үчүн, сизиктиг поларга кирек. Пирее сайбаглар табылза, специалисттерзер айланыңар.

Тимнееннер Елена ТИМОФЕЕВА, Кристина КУЧМЕНКО, Хакасияның үгрөдіг паза наука министрствозы, Марина ФИШЕР, Татьяна ЗЫРЯНОВА, МЧС-тың Хакасияча ГУ-зы



РОССИЯДА

## АЛЫМ ҮЧҮН ЧУРТТЫ АЛЫП АЛАРЛАР

**МОСКВА.** Юстиция министрствозының законопроекти хоостыра, алымныг кизині чуртын, ол сөбиренің чуртачаң чалгыс орны полза даа, алымны чабар үчүн алып аларга чарадарга сагынчалар.

Итсе, алым чабар пөгиннең полған на чуртты сат полбастар. Садыга сыгарарга итчетсе, чурттың улии пир кизее көрілген нормативтең (регионнарда ол ортымахти 14 – 18 кв.м.) ікі хати артых алай ба аның паазы алымныг кизее паза аның сөбирезине закон хоостыра пирилген чуртачаң орынның паазынаң ікі хати пөзік поларга кирек. Таныхтирға кирек, алымныг кизинің садыбысчаң пасха нима-ноозы чох полза ла, чуртын алып аларга чарадылча. Алымны чабысса, чуртты сатхан соонаң, халған ахчаны аның ээзи полған кизее айландыр пирерлер.

Российская газета

## ХАЗНА ТІЛІН ХАЙДИ ДАА ПІЛЕРГЕ КИРЕК

**ТУВА.** Республиканың үгрөдіг паза наука министрствозында пасталыг класстар паза орыс тили, литература үгретчилерін, алгыстап, чеестееннер. Пу үгретчилер республикада орыс тилин хайраллир паза сабландырар тогысты алгым апарчалар. Ідөк олар үгрөнчилерни орыс тилине көніктірчелер.

Иди сыйыхтарга пасталыг класстар үгретчилері Софья Корген-оол, Ирина Тарханова паза Ольга Хасанович турысханнар. С.Корген-оол республикада орыс тилинең паза литератураңа олимпиада иртіріп пастаан паза учебниктер тимнеен.

И.Тарханованаң О.Хасанович, үгрөнчилерін орыс тилине үгрөдіп, улуг тогыс апарчалар. Амды оларның үгрөнчилері орыс тилинең төремил чохсы пилістер көзітчелер.

Туваның  
официальной порталы

## КӨЛЕЕДЕ 84 ҮҢААЧАХ ТӨРЕЕН

**КЕМЕРОВ ОБЛАЗЫ.** 7 январьда Кузбасста 40 оолағас паза 44 хызычах төреен.

Иң көп пала – 20 – Кемеровта төреен. Новокузнецкте – 18, Прокопьевскте – 7, Киселевскта – 5, Юргада – 5, Междуреченскте – 4, Тяжинскийде 2 пала төреен. Л.Решетованың адынаң областытагы перинатальной кинде чити ыңаацах төріптір.

2016 чылда Кемеров облазында Көледе үлүкүнде 75 пала төреен, ол санда пир ікіс. Область губернаторы Аман Тулеевтиң чахиинан пу күнде пала төрөткен ічелерге 10 муң салковай паза «Кузнецк чиринде төреен» медальоннар пирилер.

Кемеров облазының  
официальной порталы

## ХЫРЫҒДА – ХОККЕЙЧЕ МАРЫҒ

**АМУР ОБЛАЗЫ.** 14 январьда Амур сугдагы пуста Россияның паза Хыдаттың аразында спорт марыглары иртер. Анда чииттерниң Амур хазындагы паза Хыдаттың Хейлунцзян провинциязының командалары хоккей ойнирлар. Пуста хоккей ойначаң коробка турғызылған, ол Россия саринда турча, хыдат саринда трибуналар пүдірчелер.

– Трибуналарда 250-че аалчы полар, Россияның көрігчилерине пистиң чардаң көрерге чохсы полар. Ол пөзік, аннаң прай нима чохсы көрінче, – теен Амур облазының спортты тилдеринче кинінің устагызы Михаил Лапин.

Россия хоккейинің 70 чылына чарыдылған мероприятие «Чохсы пус» федеральной спорт программы хоостыра иртірілер.

Российская газета



## ЧАА ОПЕРАЦИЯЗЫ СЫЛТААНДА ЧУРТТАРЫН ТАСТААННАР

**ИРАК.** Хайди искірче Чоннар аразындагы миграцияча пиригис, Ирактагы Мосул городта «Ислам хазназы» террорист группировказынаң тогыр чаа операциязы пасталыбысханда, 138 муңча кизее, иблерин тастап, тизерге киліскен.

Мосулны ИГ холынаң позыдар чаа операциязы 17 октябрьда 2016 чылда пасталғаннаң сыгара Иракта 137 муң 880 кизи пос чуртын тастаан. Оларның 135 муңы Мосул городтаң.

Новости РИА

## ЭСТОНИЯ, ЛАТВИЯ, ЛИТВА – АЛТЫНЗАРХЫ ЕВРОПАДАЛАР

**ЭСТОНИЯ.** ООН Эстония, Латвия паза Литва хазналарның статусын Искерки Европадагыдаң Алтынзархы Европадагы хазналарга алыстырыбысхан. Амды олар Алтынзархы Европадагы хазналар списогына кирчелер. Ідөк андар кирчелер Дания, Финляндия, Исландия, Ирландия, Норвегия, Швеция, Великобритания, Алтынзархы Ирландия, Аландскай, Нормандскай, Гернси, Мэн, Джерси, Сарк, Шпицберген паза Ян-Майен олтырыхтар.

Искерки Европазар ам кирчелер Белоруссия, Болгария, Чехия, Венгрия, Молдавия, Румыния, Россия, Словакия паза Украина.

Newsru.com

ТИЛЕКЕЙДЕ

Тимненіс

## ЧИҢІС КҮНІН ТУРЫСТЫҢ ИРТІРЕРГЕ

**Хакасияның пазы Виктор Зимин Илбек Чиңістің 72-чи чылын үлүкүннине тимненчең планы чарадыга алчаң пічікте хол салыбысхан.**

«Хакасияның министерстволарына паза ведомстволарына, хайзылары комплекстіг пландағы мероприятиелер үчүн нандырылгы полчалар, федеральной үлгүнү орындағы органнарына, орындағы постаныс органнарына, халых пірігістерінең пірге тогынып, 2017 чылга көрілген пландағы мероприятиелерни толдырызынаң иртірерге», – чоохталча пічікте.

Чиңіс күнін иртірерине тимненчең план 103 пункттаң пүтче, андар хазнаның оон үлүкүннинең иртіреринең палгалыстыг сурыглар кірчелер. Хумартхылас вахтазы, Пастагы май пло-

щадьындагы пайрамныг марш, «Олімі чох полк» акция осхас кибірліг мероприятиелерге хопа планзар көп пасха тогыс көстеглері кірілген. Көзідімге, ветераннарға социальная паза имнег пользыин пирері, хумартхы тастарны наачылыры паза тыхтиры. Ідөк республиканың школаларында класс частары иртірерлер. Ол класс частарында Илбек ада чаа ветераннары аралазарлар.

– Чиңіс күні – пістің хазнадагы оон үлүкүннинең пірсі. Пістің оон пігінібіс – аны турыстыг иртірері, пайрамныг паза хумартхылас мероприятиелерин тимнирі. Ол прай үлгү органнары, республиканың предприятиелері паза халых пірігістері алнында турчатхан пірге пігін. Че олох туста илбек үлүкүнге тимненіс тузында иң ооні – пістің ветераннарға хайыг, – таныхтаан Виктор Зимин.

**Хакасия пазының администрациясы**

Пүдіріг

## НАА ЧЫЛДА – НАА ЧУРТТА

**Хакасия пазының орынчызы Валерий Марков паза пүдіріг, ЖКХ министрі Сергей Можаров Асхыс аймаандагы Писхамчы аалда изелчеткен тураларда чуртапчатхан 16 сөбірее наа квартираларның клүстерін читіргеннер.**

– 2017 чылларга кізілерні изелчеткен туралардаң көзіреріне 1 миллиард 160 миллион 879 муң салковай позыдылча, ол санда: федеральной бюджеттең – 645 миллион 71 муң салковай; республика бюджетінең – 424 миллион 905 муң салковай; орыннардагы бюджеттердең – 38 миллион 216 муң салковай.

Программа төрт чардыхти чуртасха кірілче, полған на чардыхха ікі чыл пірілче, төртінчі чардых пүл 1 сентябрьга



Писхамчыдагы 16 квартиралыг тура

Ідөк олар анда ікінчі сугіс квартиралыг наа тураны көргеннер, че читпестер табылганда, пүдірігчилерге оларны түзет саларга чахыг пірілген.

2013 чылның 1 январынаң 2017 чылның 1 сентябрьна теере Хакасияда изелчеткен туралардаң наа квартираларзар 2320 кізіні көзір саларга кирек. Пылтыр 620 кізі наа квартираларзар көзіп алған. Чылның планы 100,7 % толдырылган.

Программа хоостыра 2013

толдырыл парарга кирек. Хакасияда I, II, III чардыхтарча мероприятиелер толдырыл параннар, IV чардых чамдыхти толдырыл парды. 2016 чыл тоозылганча наа квартираларзар 1931 кізі көзірілген.

Программаны чуртасха кирерінче Россияның субъекттері аразындагы рейтингте Хакасия 26-чы орында.

**Хакасияның пүдіріг паза ЖКХ министровы**

**Үр ниместе «Хакаский» заповедниктің тоғынчылары 2016 чылда апарылган тогыстың салтарларына чарыдылган чыылыг иртіргеннер. Мында заповедниктің пөліктер устагчылары араласханнар. Полғаны ла, чыл салтарларынаңар чоохтап, хыныг видеороликтер көзіткен.**

Пастап «Хакаский» заповедниктің чир-чайаанны хайраллир пөлиинің тоғынчылары чоох тутханнар. Иртенен чылда административнай сайбагларданар 119 протокол пазылтыр. Ілезі-

## ЧИР-ЧАЙААННЫ ХАЙРАЛЛИРЫНА УЛУҢ ХОЗЫМ ИТЧЕЛЕР

не сыгарылган үрег 135030 салковайга тиңнелче. Ідөк заповедниктің Хакасия МВД-зынаң паза Росприроднадзорның Хакасияча устанызынаң пірге тогыс апарчатханы таныхталған.

Ідөк улуг тогыс апарчалар наука паза экология пөліктері. 2016 чылда заповедник аймак марыглар, экология акцияларын иртірген. Чылдаң чылга араласчатхан кізілернің саны өзіп

одырча. Заповедник позы даа, аймак марыгларда аралазып, пөзік чидіглерге читче. Іди ол Россияның Орыс география пірігізінің, WWF (чир-чайаанны хайраллир чоннар аразындагы халых пірігіс) фондының, Михаил Прохоровтың фондының гранттарын утхан. Прай пу тогыс заповедниктің тилирине улуг хозым полча.

Чыылыгда ідөк 2017 чылга пөгіннердеңер искірілген. Таныхтирға кирек, 2017 чыл Россия президенті Владимир Путиннің чарадианаң онетін хайыгда тудылчатхан чир-чайаан орыннарының чылы тіп чарлалган. Ол Россияда пастагы чир-чайаан заповеднигін төстенең 100 чыл таныхталчатханына чарыдылча. Пүл пу таныглыг кирекнең палгалыстыг көп мероприятие иртірері көрілче.

«Хакаский» заповедниктің тогызынаңар чоохтаза, хайди даа аның «Оглах таг» орны ЮНЕСКО-ның азынада иділчеткен списогына кірілгенін таныхтирға кирек. Аны регионның чир-чайаанын хайраллирына, тиксі республикада туризм тилирине паза Хакасияның тархынын істезерінде чоннар аразындагы палгалыстарны пиктирине улуг хозым полча.

**Татьяна КЫШТЫМОВА**

Культура

## ОЛҢАН БИБЛИОТЕКАЗЫНЫҢ ТОҒЫЗЫ ПӨЗІК ПАЛАЛҢАН

**Россияның культура министрствозы республиканың олған библиотеказына «Россияның таныглары» проектте өткін араласхан үчүн алгызын читірген.**

Пу проектті Россияның хазна олған библиотеказы тимнеен. Чоохтирға кирек, «Россияның таныглары» проект марыгдаң паза олимпиададаң пүткен. Олимпиада хазнаның прай регионнарында пір күнде, 24 ноябрьда, иртенен.

Хакасияда «Россияның таныглары» проекттің координаторы республиканың олған

библиотеказы полған. Культура учреждениезі тоғынчыларының күстенінен Хакасияда олимпиада пөзік синде иртенен. Анда 151 олған араласхан.

Алгыстас пічинде Россияның культура министрі Владимир Мединский библиотека тоғынчылары, өсчөткен төлнең улуг тогыс апарып, олғаннарны паза саарбахтарны чир-суубысха хынарға, аның чидіглеріне погдархирға үгретчелер тіп таныхтаан.

Республиканың олған библиотеказының өмөзі, тогызын піди пөзік паалапчатхан үчүн, Россияның культура министрствозын алгыстаан.

**Анастасия ГРИГОРЬЕВА**

Үгредіг

## ХАКАСТАРНЫҢ ПАЗА ШОРЛАРНЫҢ КИБІРЛЕРІН ІСТЕСЧЕЛЕР

**Хакасияның үгредіг паза наука министрствозы искіриинен, республикада үгретчилер үгретчилерінең хада школаларда үгредіг мастерскойларын азып пастабыстылар. Анда олғаннар хакастарның паза шорларның культураларын паза кибірлерін тирең істезіп үгретчелер.**

Асхыс аймаандагы Палыхтыг суғ аалның школазындагы «Шорианочка» мастерскойда үгретчилер национальной костюмнар тік-

челер, чазанчаң ниме-ноолар чайапчалар. «Шорские узоры» мастерскойда, тізең, оолағастар ағастаң аймак нимелер идерге үгретчелер. Ідөк олар национальной ойыннар паза марыглар иртірчең тиріглер итчелер. Асхыстагы лицей-интернатта «Сибир хол» мастерскойда үгретчилер ідөк ағастаң ниме-ноолар чайапчалар.

Мастерскойларда тимнелген хакастарның паза шорларның ниме-ноолары регионнар аразындагы фестивальларда, мастер-класстарда, семинарларда көзідиге удаа сыгарылчалар.

**Хакасияның үгредіг паза наука министрствозы**

Наа чыл сыйи

## СООХ АПСАХНАҢ ХАР ХЫЗЫЧАХ САНАЛЫҢ ЧИТКЕННЕР

суғ аалның кураторы Хакасияның спорт министрствозы полча. Аннаңар Төө пазындагы саналыг чүгүрчең спорткомплектің тоғынчылары Хызыл суғ аалдагы палаларға Наа чыл сыйыхтарын читіргеннер. Олар андар саналыг чиде салғаннар.

**Хакасияның спорт министрствозы**

1 стр. ⇨

**Хакасияда кічіг паза ыраххы аалларны тилідер программа 2013 чылдаң сығара тоғынча. Аның салтарларынаңар прайзы пілче. Наа пүдіріглер, аймак пользыглар – ол уғаа чахсы кирек. Че палаларнаң тоғасханы, сыйыхтар читіргені хақан даа өрініс ағылча.**

Андағ өріністіг тоғазыг полған Таштып аймаандагы Хызыл суғ аалның чуртагчыларынаң Наа чыл алнында. Пу кічіг аалда 17 пала чуртапча. Олар Соох апсахты паза Хар хызычакты чидікпин сагыпчатханнар. Хызыл



## Ветераннар чылини

**Москвада пістің хазнаның Тиріліг кўстері ветераннарының тиксі Россиядағы халых пірігізінің III сан пірістабыг чыылини ирткен. Аның тогызында арачыланыс министрі, армияның генералы Сергей Шойгу араласхан.**

Ветераннар форумунда чоох тудып, чаа ведомствозының устагчызы ирткен төрт чылда пірігіс чахсы салтарларға читкенін таныхтаан.

– Пастагы төөстө ол тыып парган. Андар ам 14 региондагы паза орындагы 50 азыра пөлік кірче. Тиріліг кўстернің ветераннар пірігістері Крымда паза Севастопольда төстелгенер. Пірігісте ам 1,5 миллион азыра кізі саналча, – чарытхан Сергей Шойгу.

Арачыланыс министрі ветераннар пірігізінің халых-политика тузазы көдіріл парганына хайыг айландырған.

– Сірернің представительстволарың пар «Тиксі Россияның чон фронтты» халых чөрімнің өөн штабында, Россияның паза Белоруссияның арачыланыс министрстволарының піріктірілген коллегиясында, Арачыланыс министрствозындагы Халыхтар чөбінде паза пасха даа халых-хазна структураларында, сірер «афган чөрімінде» лидер полчазар, – теен министр. – Ідөк Россияның прези-

# СЕРГЕЙ ШОЙГУ: «ТОГЫСТЫ УЛАМ ТҮЗІМНІГ АПАРАРҒА»



Сергей Шойгу Олег Пагельске медаль читірге

денті төөстен «Чиңіс» оргкомитеттегі ветераннар пірігістерінің координация чөбінде сірердең түзімніг тогыс сагыпчалар.

Ол Тиксі Россиядагы «Юнармия» чаа-патриот чөрімін паза Россияның субъекттерінде аның пөліктерін төстирінде ветераннар өткін араласханнарын алынча таныхтаан. Тиріліг кўстернің ветераннар пірігізі СНГ хазналарындагы, Европадагы, Хыдаттагы ветераннар пірігістерінең палгалыстар тутчатханын чахсаа паалаан. Латвияда представительство төстелгені ідөк чахсы чарадыг

полған.

– Арачыланыс министрствозы сірернің пастагларыңа прай саринаң хабасча, – чоогын узаратхан Сергей Шойгу. – Көзідімге, чаа управление органнарының паза ветераннар пірігістерінің аразындагы палгалыстарны түзімніг идер пөгіннең алынча приказ сығарылған. Прай войсколарда, чаа округтарында паза флоттарда ветераннарнаң тогыңчаңа полысчылар должностьтары кирілген. Чаачылар комиссарларының ветераннарнаң тогыңчаңа полысчыларының

статузы көдірілген.

Чаа ведомствозының устагчызы социальной сурыглар хайди пөгілчеткенін алынча таныхтаан. Аның чоогынаң, ирткен төрт чылда чаагы службазының ветераннарына пенсия төпир законодательство чахсыландырылған. Іди оларның пенсия ахказы 28,6 % хозыл парған.

Илбек Ада чааның, чаалазыгларың ветераннарына паза оларның сөбирелеріне социальной полызыг пирер сурыглар пөгілчелер. Оларга паза Чернобыльдагы АЭС-та полған саай салтарларын чох иде-ринде араласханнарға, үрен чаачыларның сөбирелеріне пирілчеткен төлеглерге чыл сай индексация идер сурыг чарадылған. 2017 чылга федеральной бюджетте ол төлеглерге 1 февральдаң 4 % индексация иділер. Сирияда өнетін пөгіннер толдырған кізілерні чаалазыглар ветераннарына санир федеральной закон алылған. Чаагы полған ікі паза аннаң даа көп палазын чідірген паба-ічелернің пенсия ахказын көдірчеткен федеральной законның проектї правительств-

возар кирілген.

Ветераннарға имнег полызиин пирерінде чахсы көзідімнер пар. Амды ветераннарға пөзік технологиялыг имнег полызиинның 60 көрімін алар оңдайлар пар. Андаг полызыгны пылттыр 14 муң кізі алған. Амды Илбек Ада чааның кинектері чаачыларның имнег учреждениелерінде диспансеризация иртчелер. Ідөк ветераннарға тынанып, хазыгтарын пиктеп алар оңдай пирілче. Прай пу сурыгларыңа пөгер пастагнаң Тиріліг кўстернің ветераннар пірігістері сыхханнар.

Сергей Шойгу «Россияның Тиріліг кўстерінің ветераны» медаль төстирдеңер приказа ол хол салыбысханыңаң конференция араласчыларына искірген. Ветераннарнаң угаа чахсы тогыс апарчатхан үчүн, оларның кирексіністерін чуртасха кирчеткен паза чит төлні патриотизмге үгретчеткен үчүн, Россияның арачыланыс министрі, армияның генералы Сергей Шойгу Хакасияның чаачылар комиссарының полысчызы (ветераннарнаң тогысча), запастагы подполковник Олег Пагельсті ам төстелген наа медальнаң сыйыхтаан. Ідөк пасха даа ветераннар медальларнаң сыйыхтатханнар.

Тимнеен  
Николай Султреков

## Чыл салтарлары: имнег кире

# ХАЗЫХ ХАЙРАЛЛИРЫНЫҢ УЛУҒ ХААЛАҒЛАРЫ

**Хакасияның имнег киреене 2016 чыл түзімніг полған. Ікінчилес чох пастагы орынга республиканың перинатальной кинінің пүдіриин тургызарга чарир. Оборудование, сантехника паза пасха даа кирек нима-ноолар алып парган, амды имнег туразын тузаланысха кирібізере ле халды.**

Федеральной бюджеттең позыдылған ахчаа пүдірілчеткен объектї Хакасияның пазы Виктор Зимин позы хайыгда тутча. Че прай хайыг перинатальной кинінің пүдіриине салылған тізе, саба поллар. Ідөк Г.Я. Ремишевскаяның адынаң республиканың имнег туразының наа хирургия корпусы азылған. Хакасияның аалларында даа наа имнег туралары тузаланысха кирілгенер. Іди Афган пилтірі аймааның Весенний аалында, Шира аймааның Чирім аалында наа фельдшер-акушер пункттары азылған. Алтай аймааның Хызыл чазы аалында, тізең, ФАП-та, улуг өртке кірген соонаң, тыхтаг тогыстары иртірілген.

Республикабыста олғаннарның хазиин хайраллирына көп хайыг салылча. Көзідімге, Афгандагы олған имнег туразына наа оборудование алылған, ол санда ультразвуктаң сыныхтаг иртірчөң

сканер. Аның полызиинаң кинек палаларның хазиин иблерінде алай олған интернадында сыныхтирға чарир.

Афгандагы тіс имнеңең олған поликлиникасында тістерні сомға суурчаң рентген аппаратады тургызылған. Тіс имнірін пөзік синге көдірер пөгіннең Афганның ікі школазында, 26 № школада паза национальной гимназияда, тіс имнеңең кабинет азылған. Улуғ-кічиглерге хараакүнөрте табырах имнег полызиин пирчөң тіс имнеңең кабинет тогынып пастаан. Ідөк тіс имңілер бригадазы, Хакасияның ырах аалларынзар чөріп, чуртагчыларны имнеенер.

Тиксі алза, республиканың прай даа имнег учреждениелерінде чахсы саринзар алызыглар пар. «Доступная среда» хазна программазы хоостыра имнег тураларында хазиин уйан паза кинек кізілерге, имнег полызиин аларға оой полар үчүн, алынча кабинеттер азылча, пандустар тургызылча... Ідөк имнег тураларының автопаркы наачылалча. Хакасия табырах имнег полызиинның 7 наа машиназы пирілген. Олар республиканың өөн городының паза аймахтарының имнег тураларына азылғаннар.

Республиканың пала тапчаң имнег туразында реанимация пөлии азылған. Анда Иркутсктагы перинатальной киннең килген неонатолог паза реаниматолог тогыңчалар. Имңілер сөбирезі Хакасияда чуртирға халарға, республиканың пүдіріл

париған перинатальной кинінде істөнерге пөгінче.

Таныхтирға кирек, Хакасия хазых хайраллирында пасха регионнарнаң пик палгалыс тутча. Көзідімге, Хакасияның хазых хайраллачаң министрствозы Хызылчардагы «Сибирьдегі федеральной наука паза клиника кинінең» кізі органнарын алыстыраыңча тогысты хада-пирге апарарға чарадыг алғаннар. Амды республика чуртагчыларына Хызылчарда трансплантология, аар инсульттар соондагы нейрореабилитация, хирургия паза травматология көстеглерче имнег полызиин пирілер.

Ідөк Хызылчардагы онкология диспансерінің специалисттерінең чөптөзіг иділген. Хакасияның чуртагчыларына имңілер чөбі видео пастыра пирілер. Кирек полза, ағырыг кізі Хызылчарзар ызылар.

Че специалисттер чох имнег киреене хайди парарчыг? Хакасияда имңі тогызын саблапчатхан, пос киреене өтіре пілчеткен тогыңчылар иледе. Көзідімге, 2016 чылда тиксі Россияда иң артых 500 терапевт адалған, оларның санында Хакасиядагы үс имңі. Ідөк ортын имнег персоналы чидіглерінең өріндірче. Саяногорсктагы реабилитация кинінің медсестразы Ольга Уливадова «Социальной полызыглар учреждениелерінің иң чахсы тогыңчызы» тиксі Россия мариинда пастагы орынга турысхан. Прай пу пөзік чидіглер имнег киреенде наа ла

тогынып пастапчатхан специалисттерге чахсы көзідім полча.

Республиканың имнег учреждениелерінзар 116 чит имңі килген, оларның 29-зы аалларда тогынар. Хайди таныхтаан Хакасияның хазых хайраллачаң министрі Наталья Коган, республикада имңілер чидіспинчеткенінең палгалыстыг сурыгларға көп хайыг айландырылча. Пүүңгү күнде имңілер тимнеңең вузтарда көстегліг үгредігче 277 кізі үгренче. Оларның 214-і стипендия хоза төлег алча.

Ідөк Хакасияда 2012 чылдаң «Земский доктор» программа тогыңча. Аны хоостыра аалларзар тогынарға килген чит имңілер пир хати пирілчеткен төлегні – 1 млн салковайны – алчалар. Программа тогынып пастааннаң, Хакасияның 200-че имңізіне ахчалыг хабазыг пирілген. 1 млн салковайдаң пасха, чит специалисттерге полызыглыг ахча пирілче, аның сині – 150 муң салковай. Тогысха кіріп алғаннаң үс чыл ирткенче, чурт арендазы, чурт-коммунальной полызыглары үчүн төлеен ахчаны айландыр пирчелер. Угаа киректелчеткен специальностьтыг имңілерге служебнай чурт пирілче.

Мыннаң мындар республиканың хазых хайраллачаң министрствозы имнег киреене чахсыландыраыңча тогысты узарадар. Түрчөден, тиксі тыхтаг тогыстары иртірілген соонаң, Хакасияның онкология диспансерінің имнег-диагностика корпусы азылар. Республика пазы Виктор Зиминнің чахииннаң радиология корпусы пүдірілер. Пүүңгү күнде аның пүдіриине кирек пічіктер тимнелче, чир участогы пөліл парған. Ідөк пөгінде – республиканың олған имнег туразының пүдіри.

Татьяна Кыштымова

Пайрамның төреен күні

## ЧООХТАРЫ ЧУРТАСТАҢ АЛЫЛЧА

**Пу чагында писатель Радион Топоев пайрамның төреен күнін, 50 чазын, таныхтады. Ол 1967 чылда 1 январьда Асхыс аймаандагы Пырған аалда төреен. Пабазы Прокопий (Исопка) Владимирович Ис совхозында чабан полған. Ічезі – Пелагея Сергеевна (Токояковтар хызы). Сөбіреде алты пала өскен.**

**Радион Топоев, хончы Ис пилтірі аалдагы ортымах школаны маңнаныстыг тоозыбызып, Ағбаңдагы үгретчилер институтының филология факультетиндер үгренерге кірген. Институт соонаң Радион Прокопьевич Ис пилтіріндегі школада істен сыххан. Амгы туста ол школада хакас тілі паза литература уроктарын апарча паза**

– Радион Прокопьевич, хаңаннаң сығара Сіреп чайаачы тогыснаң айғас сыххазар?

– Мин Ис пилтіріндегі школада кічиг класстарда үгрөнчөткөнімде, чоохтар пазарға пастаам, литература кружогына чөріп, «Ленин чолы» газетаның «Тас оола» пулуңазыңар улуг нимес чоохтар пасчаңмын. Пу тогысха мині Олег Борисович Топоев көніктірген. Ол улуг класстарда үгрөнчөткөн. Піске пазыңар, соонаң писатель, журналист поларзар тіп чоохтаңар.

– Пастагы чайаачы тогызыңардаңар чоохтап пиріңер.

– Пастап ныха полған. Ол «Чатхан соонча» адалған. Газетада адым сыхханда, уғаа өрінгем. Пир неделя пазыңаң гонорар килген. Редакциядаң мағаа пир салковай ыс пиргеннер. Аны піліп алып, пасха олғаннар ідөк пас сыхханнар. Улуг класстарда үгрөнчөткөнімде, мин школада нима полчатханын прай пасчаңмын.

Ол туста уғаа көп кнгалар хығырчаңмын, аал библиотеканың иң көп кнга хығыр салғам. Библиотекарь Дора Макаровна Чебодаева мині иң чыхсы хығырчы тіп махтаңар. «Син иң көп кнга хығыр салтырзың», – тіңең. Пірее чылда 200 артинаң кнга хығыр салчаңмын.

– Писательлердең кем Сіреге көзідім полған?

– Харындазым Илья Топоев мағаа көзідім полған. Ол туста аны чыхсы таныпчатханнар. Чоохтары «Ах тасхыл» журналда паза «Ленин чолы» газетада сыхчаңнар. Ідөк Василий Шукшиннің чоохтары көңніме кірген.

– Илья Топоев Сіреге пазарға полысчаң ма?

– Мин чоохтарымны көбізін поэтым сығарчаңмын. Соонаң харындазым мағаа полыс сыххан, пірее чоохтарны түзөт пирчөң.

– Сіреп өңінде детективтер ле пасчазар ба?

– Детективтерні ам на пас сыхтым. Мының алнында олғаннарға чоохтар пасчаңмын. Көңніме детективтер паза тархын кнгалары кірчөңер. Ол кнгаларны хығырып, андағох чоохтар пазарға сағыныбысхам.

– Сірепнің пастагы кнгаңар «Сүлейкедегі ис» адалған. Ол кнганы пазарыңда материалларны поэтыңар сағынып алғазар ба алай пазылған киректер чуртастаң алылған ма?

– «Сүлейкедегі ис» кнганы пасчатханда, материалларны өңінде газеталардаң хығырып алчаңмын. Пірее киректер чуртастаң алылған. Поэтым пілген сайбағлардаңар пас салғам. Кнгада хакас хыстар, пасха нациялыг кізілерге ирге парып, оларға хайди сохтырчатханнарынаңар күлкее тартып пасхам. Паза таныс кізілерні кир салғам. Амгы тусха үс кнга сығарыбыстым. Аннаң пасха хакас литература учебниктерін тимнирінде араласчам.

– Ол учебниктерні тимниріне Сірепні кем тартып алған?

– Мині, автор чили, учебниктер төстөгөзі Мария Сергеевна Арчимаева хығырып алған.



Писатель Радион ТОПОЕВ

Ол учебниктер тимнирінче тогыстың устағчызы полған. Пу тогыснаң 1990 чыллардаң айғас парирбын. Піс тимнеен хакас литература учебниктеринің ікінчи сығарызы 2007 чылда полған, анаң 2014 чылда пазох сығарылған.

Пастагы улуг чайаачы тогызым «Сүлейкедегі ис» 1999 чылда сыххан. 2005 чылда «Өліміңні сахта» кнганы сығарғам паза «Паночах» кнганы харындазым 2013 чылда сығарыбысхан, андар минің пис чоогым кірілген.

1990 чылларда сайбағлар удаа іділчөң. Олардаңар газеталардаң хығырып, хоза киректер кіріп, детективтер пасчаңмын. Көзідімге, «Сүлейкедегі ис» кнгада мин Ағбан город хырындағы Хызыл Ағбаңда полған өдірістеңер пасхам.

– Сіреп, үгретчи полып, олғаннарны ідөк пазарға көніктірчө поларзар?

– Мин Ис пилтіріндегі школада 25 чыл тоғын салдым. Олғаннарға хакас тілі паза литература уроктарын иртірчөм паза литература кружоғын апарчам. Кружокка чөрчөткөн олғаннар «Хабар» газетаның «Хола пырғычах» страниказына пічктер пасчалар. Пу тогыснаң 20-че чыл айғас парим. Кружокка чөргөн үгрөнчилер прайзы даа институтсар кіріп алғаннар, піреезі ам даа чайаачы тогыснаң айғасча. Үгрөнчим Николай Тинников кибелістер пасча, тахпахтапча, түрчө полза, кнга сығарыбызарына ізенчөм.

– Пу чагыңа хайдаг пөйгінер тургысчазар?

– Амгы туста төртінчи кнга сығарыбызар сағыс пар. Анда ідөк детективтер паза баснялар полар.

– Чоохтарыңарда матырлар хайдаг хылыгытыллар?

– Детектив жанрлыг чоохтарымда оңның нимес матырларым істі чоохтар, ікі сырайлыг, оғыр, тылаас сығарчатхан, арғаас, постарына сьданмас кізілер. Олар, постары чыхсы чуртабин, пасчаларына иптг чуртирға пирбинчелер. Оңн матырлар – ачыч-чарых, күлүк паза хыйға кізілер.

– Хайдаг хакас писательлернің чоохтары Сірепнің көңніңерге кірчө?

– Мин Митхас Туран паза Георгий Топановтың тогыстарын хынып хығырчам. Көңнімні көдірерге сағынчатсам, Илья Топоевтің хормачы чоохтарын хығырчам.

– Чуртазыңарның хайдаг кизегін Сіреп иң хыныг тіп саналчазар?

– Школа тузы табырах ирт парған, тадин сизинмин халғам. Иң хыныг институтта үгрөнгөн тус: үгрөнис, хыныс паза чыхсы үгретчилер. Соонаң армиядагы служба тузы хыныг ирткен. Германияның Лейпциг городында служба ирткем. Ікі чыл аразына көп кізінең танызып алғам, оларның чуртазын піліп алғам.

– Хығырыңыларға хайдаг чөп пирерчкисер?

– Пос чоңына, Чир-сууна хынарға. Хайдаг даа сидік туста кізі поларға.

Чоохтасхан  
Антон ЧЕРТЫКОВ

Кибірлер

**Наа чыл паза Мылтых үлүкүннері алнында нанчыларға алай ибдегілерге сыйых идерге тіп, аймак пічктерде хазынғам. Іди «Россия» газетада пир чапсых чоохха урун парғам. Ол «Ближнему коза» адалған.**

Хайди за, мин орыс тілінең чоохтанчам! Іди, тураа кір киліп, кузулка сыйлапчазың паза хыныг чоох чоохтапчазың алай ыр ырлапчазың. Ізік хырында тапсабин турарға чарабас.

Че хакастап ол кузулканы хайди адачаңнар? Анзынаңар пістің «Ленин чолы» газетада тоғынған писатель Александр

## НИМЕДІР ОЛ АРҒЫМАХ?

Архангельск город ибیره чирлерде пурунғыдаң сығара чыхсы кибір пар полтыр. Наа чыл паза хысхы Мылтых үлүкүннері алнында мал-хустарның омаларын халас итчөң тестводаң чайап алып, туғанчағыннарға сыйлачаңнар.

Пістің дее Шира аймаандагы хакастар, андаг кибірні истіп, тестводаң мал-хустарны идіп, удур-төдір сыйласчаңнар. Оларны «кузулка» адап алғаннар. Оларны сыйлап, иб істінде паза хазаа-хахпахта пай хоных ползын тіп алғаңаңнар. Совет үлгүзі тузында ол кибір тасталтыр. Аны хан үлгүзі тузындагы хомай кибір теен одырлар.

Ол кузулканы, олаңай уннаң идіп, соохта тасхар сығар салчаңнар алай холодильниксер тургысчаңнар. Анаң на улуг песке суғып пызырчаңнар. Тесто нымзах полза, хатыг идіп алчаңнар. Ізіг песте оларны сала хызартып аларға кирек, че көйгіспеске. Іди хайзы кізілер, кузулка итпин, олаңай пряник пызырып алчаңнар. Үр турзын тіп, аннаң сахарны глазури идіп, аннаң кузулканы сүртбісчөңер.

Ол кузулкаларны ал чөреге өнетін сүүмегестер тікчөңер. Минің дее Клавдия чачам мағаа андаг сүүмегесті хатыг сүбүрөктең тігіп, артын чөрчөң паг хоза тіккен. Абаам мині хысхаңа кибелістер хығырарға үгрет салған. Минің хоғдайғаным пу чир нимес!

Елена  
АБДИНА-ТРОЯКОВА

Үлүкүн

## НАА ЧЫЛ СЫБЫЧАА ӨРІНІС СЫЙЛААН

**Асхыстагы Культура туразыңда олғаннарға Наа чыл сыбычаа ирткен. Аны кинек олғаннарға Асхыс аймааның чонга социальной полызыг пирчөң управлениезі иртірген.**

– Піс 18 часха читкелек кинек олғаннарға Наа чыл сыбычаа иртірчөбіс, – тіпче чонга социальной полызыг пирчөң управлениезі устағчызы Ольга Васильевна Юнгкейм. – Аймахта прай 170 кинек пала саналча. Наа чылға прайзына сыйыхтар тимнеөбіс. Че сыйыхтарны тимниріне

пос ла күзі читпинче, аннаңар идінчөктерзер айланғабыс, аймак киніндегі прай даа сядыг тураларынаң піске поллысханнар.

Наа чыл үлүкүні пастапыбысханда, палаларға паза паба-ічелеріне алғыстас сөстерін Асхыс аймааның пазы Абрек Васильевич Челтыгмашев читірген. Культура туразының тоғынчылары, чайаачы олғаннар аалчыларға хыныг ойын көзіткеннер. Соох Апсах палаларға сыйыхтар пирген. Анаң олғаннарны, мыңдох стол кистінээр хығырып, тадылыг чиистернең сыйлааннар.

Михаил ИДИМШЕВ



## Культура

## ХАКАСИЯДА КИНО СУУРЫЛЧА

**П**ылтыр, Кино чылында, Хакасияда «#PROКино. Регион 19» проект чуртасха кирілген. Аның өөн пөгіні чуртагчыларны фильмнер суурчатхан чир-сугчыларынаң паза оларның чайаачыларынаң таныстырары полча. Чоохтирға кирек, наа проектти республиканың культура министрствозы «КИНОsafe» ООО-наң хада тимнеен.

Пастагызын на мероприятие августта тикси Россиядагы «Кино хараазы» акция тузында иртірілген. Кізілер Максим Усовтың, Антон Литвиненконың, Карим Тугужековтың фильмнерін көріп алғаннар. Ікінчизин кинога хынчатхан улус 28 декабрьда чыылысхан. Көрігчлери «Кирек Хакасияда полча» республика мариинның чиңсчлериңиң тогыстарынаң танысханнар.

Пастап сөс алған культура министри Светлана Околькова. Ол таныхтаан: «Кирек Хакасияда полча» марыг 2016 чылда 1 июльда «Сибир Ил» чоннар аразындагы форум тузында иртен. Жюри тогызынаң устааннар Россияның саблыг артизи Михаил Пореченков паза Россияның арачыланыс министрствозындагы культура устанызының пагыгы Антон Губанков. Антон Николаевич Хакасияның улуг нанчызы полған, 25 декабрьда Арачыланыс министрствозының ТУ-154 самолёды Хара талайда саайланганда, аның чуртазы үзілген». Пу сөстер сонаң көрігчлери, хоргыстыг саайда чуртазын чидірген артисттерни, хабарчыларны паза чаачыларны хумартхылап, пір минута сым турғаннар.

«2017 чылда піс А.Н.Губанковнаң хада «Сибир Ил» форумда «Ах чарых Анна» фестиваль иртірерге пөгінгебіс, – узаратхан чоогын Светлана Анатольевна. – Пу сагысты чуртасха хайди даа кирерге кирек, фестиваль Хакасиядагы киноискусствоны тилдерге пользар. Ізенчем, «Кирек Хакасияда полча» марыгның лау-



Режиссерлар Алексей БОЙЧЕНКО паза Карим ТУГУЖЕКОВ

реаттарының тогыстары фестивалының афишазына кирер».

Көзидіг «Хакасфильм» киностудия суурған фильмнең пасталған. Грант ахчазына авторлар Юрий Курочка паза Марина Канадакова Хакасияның чир-чайаанына чарыдылған тогыс тимнебіскеннер. Олар республиканың чапсых орыннарын, аң-устарын көзіт пирерге күстенгеннер. Сценарист Марина Канадакованың танинаң, өнетін аппаратура чох тогынарга сидік, іди дее полза, Юрий Курочка олаңай цифровой камера абаны, пүүрлерни, сыынны, силейни, сас өртекті, турнаны паза пасха даа аң-хусты суурып аларға оңдай тапхан. Итсе, ах киикти Юрий Викторович най ырахтын сууртыр, аннаңар авторлар чоохтабаан ползалар, пу туйгахтыг аңы көрігчлери пір дее танып полбасчыхтар.


Чит устар Михаил Мерзликин паза Дмитрий Паршин «РТС» телерадиокомпанияда істенчелер. Олар тимнеен тогыс «Хакасия – Худай чирі» адалча.

Мында чоох ызых чирлердеңер парча. Фильмни суурып, авторлар Оңно тағларында, республиканың тигір алтындагы азых музейлерінде пол килгеннер. Таныхтирға кирек, Хакасияның ызых чирлеріне чарыдылған тогыстар телевидениеде удаа сыхчалар. Чит чайаачыларның фильмнери нименең пасхалалча? Михаил Мерзликиннең Дмитрий Паршин көрігчлериге пу чирлерде орта тудынарга, оларны хайраллирға кирек тіп сагысты читір пирерге күстенгеннер.

Узінчл фильмниң авторлары Карим Тугужеков паза Алексей Бойченко полчалар, че оларның тогыстарын чылған чон көр полбаан. Чит режиссерлар кинонаң үр ниместең айгасчалар, аннаңар оларға «Ибзер чол» фильмни читіре тимнебізерге тус читпин партыр. Фильмниң үзігін не көзіт пиргеннер. Тогыстарынзар чайаачылар мультипликацияны кирібіскеннер. Ол саринаң «Ибзер чол» фильм Роберт Земекстиң «Кто подставил кролика Роджера» кинозына төй полтыр.

← 7стр.

## ХАЙДАҒ КҮН ПОЛАР



Сом Максим АХПАШЕВТИ

## АҒБАН

Погода в Хакасии – rp5.ru

Среда - 11 январь	Четверг - 12 январь	Пятница - 13 январь	Суббота - 14 январь
ХАРААЗЫН КҮНӨРТЕ -10°...-9° -8°...-11° Пулуттыг, хар	ХАРААЗЫН КҮНӨРТЕ -14°...-16° -14°...-15° Пулуттыг, тубан	ХАРААЗЫН КҮНӨРТЕ -12°...-11° -10°...-12° Пулуттыг, хар	ХАРААЗЫН КҮНӨРТЕ -16°...-18° -13°...-14° Пулуттыг

## АСХЫС

Среда - 11 январь	Четверг - 12 январь	Пятница - 13 январь	Суббота - 14 январь
ХАРААЗЫН КҮНӨРТЕ -14°...-12° -10°...-13° Пулуттыг, тубан	ХАРААЗЫН КҮНӨРТЕ -17°...-15° -13°...-14° Пулуттыг	ХАРААЗЫН КҮНӨРТЕ -11°...-13° -10°...-13° Пулуттыг	ХАРААЗЫН КҮНӨРТЕ -17°...-17° -12°...-13° Пулуттыг, хар

## ТАШТЫП

Среда - 11 январь	Четверг - 12 январь	Пятница - 13 январь	Суббота - 14 январь
ХАРААЗЫН КҮНӨРТЕ -11°...-10° -7°...-10° Пулуттыг	ХАРААЗЫН КҮНӨРТЕ -15°...-13° -10°...-9° Пулуттыг	ХАРААЗЫН КҮНӨРТЕ -9°...-11° -8°...-11° Пулуттыг, хараа хар	ХАРААЗЫН КҮНӨРТЕ -13°...-15° -11°...-12° Пулуттыг

## ШИРА

Среда - 11 январь	Четверг - 12 январь	Пятница - 13 январь	Суббота - 14 январь
ХАРААЗЫН КҮНӨРТЕ -13°...-13° -11°...-13° Пулуттыг	ХАРААЗЫН КҮНӨРТЕ -15°...-16° -12°...-14° Пулуттыг, иртен тубан	ХАРААЗЫН КҮНӨРТЕ -14°...-17° -12°...-14° Пулуттыг	ХАРААЗЫН КҮНӨРТЕ -16°...-17° -14°...-16° Пулуттыг, хараа хар

## ХАБАР

Известия



Төстөгчлери:  
Хакас Республика  
Правительствозы,  
Өөркі Чөбү  
Сыгарыгычы:  
ХР АУ «Хабар» газетаның  
редакциязы»

Өөн редактор  
Радиоң Дмитрийевич  
СУНЧУГАШЕВ

Телефоншар:

Премнаи	22-22-97
Өөн редактор	
орынчызы	22-21-47
Секретариат	22-63-69
Бухгалтерия	22-27-49
Үгредіг паза	22-85-67
наука	34-72-04
Соц. политика	22-85-66
	22-62-87
Право	
хайраллири	22-23-98
Культура	
паза спорт	22-85-68
	22-61-16
Хабарлар	34-72-07
Экономика	22-85-64

Редакцияның, сыгарыгычының  
адресі:  
655017, Ағбан г.,  
Щетинкин орамазы, 34,  
www.khakaschiry.ru  
e-mail: stranahabar@mail.ru

Газета педеляда үс хати  
сыхча: вторникте, средада,  
пятницада

Газетаны Хакас Республи-  
кадагы Россвязьохранкульту-  
раның управленнезі пічкке 13  
августта 2008 чылда кирген.  
Пічкке кирген номері ПИ  
№ТУ 19 - 00005

График хоостыра номер  
тимге сыгарға кирек 18.00  
часта

Номер тимге сыххап 10  
январьда 17.30 часта

Номер редакторы  
Татьяна Кыштымова

Газета «Типография  
«Хакасия» ОАО-да  
сыгарылған.  
655017, Ағбан г.,  
Щетинкин орамазы, 32  
Индекс 52261  
Заказ  
Тираж 1830  
Садылчатхан паазы пос

Газета 1927 чылда 1 июньда  
төстөгөн.  
1927-1959 чылларда «Хызыл  
аал» адалған.  
1959-1991 чылларда «Ленин  
чолы» адалған.  
1977 чылда «Знак Почета»  
орденнең сыйыхтатхан.  
1991-2008 чылларда «Хакас  
чирі» адалған.